

Malogge-Clique

1933

Isch das nit e Schnitzelbank?
Meischtens het me 's Deifelsdank.
Mir sin vo Moskau zahlt, 's isch woahr,
Di letschte vier vom Bläsidor.
Doch leider nimmt d'Bigeischterig ab - -
Mir briele-n-uns in's eigeni Grab.
Denn au bi uns git's dummi Seggel,
Der Bodemaa dänkt: Pfyffedeggel!

D'Hooggekryzler wänn guet läbe,
Dien d'Plakat vom Hitler kläbe - -
D'Polizei seit jo derzue,
D'Kommunischte druggt der Schueh;
Si kemme hüffewys im Trab
Und rysse d'Hitler-Helge-n-ab.
Und wo no kläbe blybt die Schand,
Do stähle sie's mit samt der Wand!

's Fundbüro vom Eglisee - - -
Gobverglemme, nundedje:
Strimpf und Schueh fir jedes Alter,
Gorset, Hemmli, Büstehalter,
Gummistrimpf und Puderdösli,
Und verbrunzti Damehösli.
Me sott dä Miggis äntlig hole,
's duftet scho zue dem Deifelhole!

E Luuskaib isch der Ignaz Hummel,
Dä inszeniert e Daubmann-Rummel.
Der Wettsteiplatz kennt viel verzelle
Vo Sattler- und vo andere G'selle!
Me het nit b'sunders g'spahrt derby
Mit Autofahrte, Fläschewy - - -
Jetz isch Schluss mit Gäld verjuble.
Z'Basel git's doch grossi Duble!

Der Märtpplatz isch jetz heillos scheen,
Sitdäm die beide Brünne schtehn!
Eierkische vo Zimänt,
Der Stolz vom Baudepartemänt,
Und mit zimlig grosse Reehre,
Wie im Grossrot g'wissi Here. - -
's Wasser isch zwor nit so weich,
Doch 's isch fascht der glychi Seich.

Kino-Zauber, grosse Fimmel!
All Pfitz keit e „Stärn“ vom Himmel.
Meischtens kunn e dummi Gans,
Därmol isch's der Albers Hans!
Baued um - s'Theater-Hus,
Machet doch e Kino drus!
So-ne Typ macht d'Wyber doll - -
Und ihr hän der Lade voll!

Dänkt me-n-an der ehrlich Finder,
Wird me rot und sait: Pfytschinder!
Dä ka sich fir zwanzig Franke
Bi der Pollizei bidanke - - -
Zäh Dag Kachle, 's isch e Hohn,
Kriegt e Mensch als Finderlohn,
Und als Lohnhof-Renommé
In-ere Zälle - Lüs und Fleeh!

Ueber 's Stadtplanbüro git's
Mänge guete Bärner-Witz!
Ummestoh und d'Wänd a-gaffe
Brucht meh Zyt, wie vorwärts schaffe.
's duet der Staat verdammt viel koschte,
Doch der Schueschter het sy Poschte
Und im Grind der Hitler-Wahn:
Iberschrift: Vierjohresplan.



Kemmet alli am Sunntig z'Obe am siebeni an
Schlussoobe vo de Comité-Schnitzelbank in
Mussigsaal im Stadt-Kasino.